

BATAKURU PUULUSA HAA

E 'BE KOLOOSI 'BEN

1 ¹Immorde e an min Puulusa, mo Alla hoddiri wonugol *sahaabaajo Iisaa Almasiihu on, wondude e oo musiddo men wi'eteedo Timotee, ²haa e mon onon, bee musibbe amen humondirbe e *Almasiihu on, gomdinbe wonbe Koloosi, sella-findeebe. Yo moyfere e buttu wonan on immorde e Alla Baaba men.

Fii no Puulusa Jarniri Alla

³ Meden duumi e jarnugol Alla, on Ben Iisaa Almasiihu Joomi men on, e nder ko men torantoo on kon. ⁴Ko fii men nanii fii ko gomdindon Iisaa Almasiihu on kon no wowlee, e giggol ngol yidudon yimbe Alla 6en fow ngol, ⁵sabu tama'u mo maranadon on ka kammu, on mo daaluyee goongaajo on andinnoo on fii mun, dun ko Kibaaru Moyyo ⁶hewtudo ka mon on. Ko wano o woni wadirde batte, o laya e aduna on fow non, ko wano non o woni wadirde batte e hakkunde mon gila jnande nanudon andudon moyfere Alla nden e nder goonga on, ⁷bawto Epafaraasi, oo gido amen e gollidoowo e amen, hewtinde on dii janndeeji. Himo wonani on golloowo sella-findeejo e telen-ma Almasiihu on, ⁸awa kadi o banginanii men fii giggol ngol Ruuhu Allaahu on wadi e mon ngol. ⁹Ko dun wadi, menen kadi, gila jnande men humpitii dun, meden duumii e toranagol on Alla, e toragol yo on hebbine gandal fii faale makko on, wondude e kala faamu e hakkil iwrudun e Ruuhu Allaahu on, ¹⁰fii no wuuriron noone no hawrirani Joomiraado on, e no welira mo e kala noone, ngurndan mon dan rima kala noone kuude moyfe, beydodon e andugol Alla, ¹¹bawgal mangu makko ngun tiidina on e kala huunde, fii no woniron ɻajniibe e mujniibe, ¹²e hoore hidon jarnira Baabaajo on weltaare, on Wawnudo on hebugol gebal ka ndondi ndi o marani gomdinbe ben

ka laamateeri ndaygu,¹³ on Jattindo en mbawdi nibe den,^a o addii en ka laamateeri Biddo makko yidaado on,¹⁴ on mo hebirden cottudi wonkii e yaafuyee junuubaaji.

Fii Bural Iisaa ngal

¹⁵ Ko on Biddo woni mbaadi Alla mo yi'otaako on, ko kanko woni afo e hoore kala ko tagaa. ¹⁶ Ko fii ko e makko kala huunde tagiraa ka kammu e ka hoore leydi, ko yi'otoo e ko yi'otaako, dun ko julle laamu e laamuji e hooreyaagal e bawde, fow ko e makko tagiraa, e fii makko kadi tagiraa. ¹⁷ Ko kanko adii kala huunde, e kala huunde ko e makko woniri. ¹⁸ Ko kanko woni hoore bandu ndun, dun ko *moftal ngal. Ko kanko woni Fuddoode nden, e adaado immintineede e hakkunde maybe ben, fii no o wonira Arano e di fow. ¹⁹ Ko fii welii Alla ka ko woni e Alla kon fow wona e Almasiihu on,²⁰ e moyyintinirgol fow e makko kanko tigi, ko woni ka hoore leydi kon e ko woni ka kammu kon, e nder wadugol buttu rewruude e yiyian makko hibbaadan dan ka hoore *leggal makko altindiraangal.

²¹ Onon kadi, bee wodditinoobe Alla e aybe makko sabu miijooji mon din e kuude mon bonde den,²² jooni non ko mayde bandu makko ndun o moyyintiniri hakkunde mon e makko, fii no laatoron yeeso makko kanko Alla laabube, be aldaa e ella e be felnaaki,²³ kono non, ko si tawii hidon duumii e gomdinal ngal, hidon tabintinaa, niibinaa e maggal, hara on wodditaaki tama'u mo hebirdon Kibaaru Moyyo mo nanudon on. On Kibaaru fejnjinanaado kala tagaado ka ley kammu, ko on min Puulusa mi wonti kurkaadu mun.

Fii no Puulusa Yangorani Moftal ngal

²⁴ Jooni mido weltii e nder tampereeji an din fii mon. Ko fii, e an min, mi timminirii bandu an ndun ko yakkunoo e tampereeji Almasiihu on, fii bandu

^a1.13 «Mbawdi nibe den»dun ko doole bone on.

makko ndun, ndun-le ko moftal ngal.²⁵ Ko ngal moftal mi wonani kurkaadu, wano Alla nelirimmi non fii fejnjinangol on daaluyee makko on e ko woni e mun kon fow,²⁶ dun ko on gundoo neebunoodo suudaade e nder jamaanuji din fow, kono jooni o fejnjinanaama laabube makko ben,²⁷ ben 6e Alla faalaa andinde ko hondun woni ngalu mangu on gundoo e hakkunde leyiyi din fow. Ko woni on gundoo: Almasiihu on no e mon, ko dun woni tama'u mangu ngun.²⁸ Ko on men woni fejninde fii mun e nder hajagol, janna kala neddo e dow faamu timmungu, fii no kala neddo laatora mokobaa e nder humondiral e Almasiihu on.²⁹ Kodun mi woni gollande, e nder tippirgol e doole makko wonde gollude e an no tiidiri den.

2 ¹Awa, mi faalaa yo on andu ko tippiro hongo mi rondii fii mon, onon e bee 6e Laa'udiisa e 6e yi'aali lan haa hande ben.²Dun ko fii no berde ma6be den wakkilora, e no 6e tamondirira e nder giggol, 6e heba kala ko woni e pellital heewungal iwrungal e faamu, fii andugol gundoo Alla on, dun ko *Almasiihu on tigi,³ on mo ngaluuji faamu ngun e gandal ngal fow suudii e mun.⁴ Ko mi wi'iri dun, ko fii wota hay gooto faljinir on yewtereeji weldi.⁵ Ko fii, si tawii mi tawdaaka e mon e bandu, kono haray mido wondi e mon ka bernde, mido welton yi'ugol nanondiral yaadungal wongal hakkunde mon ngal, e tiideendi gomdinal mon ngal e telen-ma Almasiihu on.

Fii Hebirgol Almasiihu on Ngurndan Heewudan

⁶Nde tawnoo on jabii Iisaa Almasiihu on wona Joomi mon, awa duumee e humagol e makko.⁷Iree dadì mondin e didoodi mon ndin e makko, tabiton e nder gomdinal ngal wano janniradon non, wonon heewube jarnugol.

⁸Reenee, wota hay gooto e mon hiile, nangiree faamu neddanke e dayni meereeji immorde e aadaaji neddanke e mbawdiji adunayankeeji, di tawata wonaa e Almasiihu on iwri.⁹Ko fii allankaaku Alla ngun fow no e neddankaaku Almasiihu on,¹⁰ awa kadi on wonii timmube e kala huunde e nder yubbondiral

mon e makko, dun ko on Wondo yeesoojo kala laamu e kala bawgal.¹¹ Ko e nder humondiral mon e makko kadi sunniniradon *sunninannde nde wadiraaka juude neddanke, kono hara ko sunninannde nde Almasiihu on wadi nden, dun ko boorugol bandu junuubankeeru ndun.¹² On surridaama e makko, e nder *looteede maande kisiyee, on immintinidaama e makko sabu ko gomdindon bawgal Alla ngal kon, on Immintindo mo e hakkunde maybe ben.¹³ Onon, ɓe tawata maayiino sabu bonnereeji mon e sabu angal sunninegol mon, kanko Alla o wurnitidii on e Almasiihu on. O yaafanike en bonnereeji men din fow.¹⁴ O montii derol jamaale windanoongol e hoore men ngol, ngol ngol tawata yamirooje mun no ɣannani en, o ittiri ngol fempugol ngol ka *leggal altindiraangal.¹⁵ O boorii laamuji din e bawde den, o weebitii de e kene e yeeso fow e nder foolrigol de leggal altindiraangal ngal.

¹⁶ Awa kodun wadi, wota gooto jaawu on fii ko jaamoton kon e ko yaroton kon, maa fii juldeere, maa lewru heyrus, maa jalaade fowteteede e mun den.¹⁷ Dun fow kodowdi piiji aroyaydi din, kono haqiiqa on ko di Almasiihu on din.¹⁸ Wota on jabu ben yimbe yidube yankinorde tampingol bandu ndun e rewugol malaa'ika hippoo on mbuunaari mon ndin. Sifa ben yimbe ko hoolorbe koydi mun. Hibe hebbinora mawnintinaare nde alaa nafa, immorde e mijooji neddanke,¹⁹ edii be humaade e Hooreejo on, on mo bandu ndun fow jogondiriri sabu mun, fottiri jokke den e dadi din, mawni no Alla yidiri non.

Fii Wuurugol e nder Humondiral e Almasiihu on

²⁰ Nde tawnoo on maayidiino e Almasiihu on, on sertii e dii mbawdiji adunayankeeji, ko hondun jabanton ɓe fawa on dii aadaaji, wa si tawii hidon w提醒 aduna,²¹ dun ko «wota a meemu dundoo!», «wota a mettu fundaal!», «wota a foppo duntoo!»²² Dii aadaaji fow si huutoraama kodi bontaydi, bay ko di yamirooje e janndeeji neddanke.²³ Pellet, ko goonga, din aadaaji no nandi e

faamu, bay hidi catii e dewal anniyaangal immorde e neddanke, e yankinaare e yangugol bandu, kono di alanaa neddanke no o wawtora hoore makko.

Fii Booragol Kuude Bonde den, Bornoo Kuude Moyye den

3 ¹ Bay non on wurnitidaama e *Almasiihu on, haray dabbee piiji wondi ka dowdin, ka Almasiihu on joodori ka sengo jaamo Alla ton. ² Mijee fii ko woni ka dow kon, hara hinaa fii ko woni ka hoore leydi kon. ³ Ko fii on maayii, ngurndan mon dan no suudii e Almasiihu on ka Alla. ⁴ Awa, nde Almasiihu on, dun ko ngurndan mon dan, feeniti, haray on feeniday e makko ka mangural.

⁵ Awa waree piiji adunayankeeji wondi e mondin, dun ko wano: jinaa e angal laabal e himmeeji e faaleeji bondi e miile, (ko fii miile ko rewugol sanamu).

⁶ Kodun addata tikkere Alla nden e hoore murtube ben. ⁷ Ko nii wuurnodon oya tuma, wa fewndo junuubu ardinoo ngurndan mon dan. ⁸ Kono jooni non, onon kadi bugitee dun fow: dun ko tikkere nden e monee on e hunyéendi ndin e hoyre nden e haalaaji bondi yaltaynoodi e kundule mon din. ⁹ Wota on fenindiran, onon bee bortiibe tagu hinngu ngun e kuude mun, ¹⁰ bornii tagu hesu heydintinaangu e noone mbaadi on Tagudo ngu, fii no waawiron mo andude haa timma. ¹¹ Don alaa *Gereekiyankeejjo maa *Yahuudiyankeejjo, maa sunninaado maa mo sunninaaka, maa lenol ngol finaa maa lenol kaana-jikkuwol, maa maccudo maa dimo, kono ko Almasiihu on woni fow, woni e fow.

¹² Bay ko on subaabe Alla, laabube, e yidaabe makko, bornee yurmeende tiidunde e moyyuki e yankinaare e newaare e yondinaare. ¹³ Muujnondiranee, yaafondiron si tawii godso no mari ko wullito e hoore oya. Wano Almasiihu on yaaforani on non, onon kadi wadiree wano non. ¹⁴ Kono, e hoore dundoo fow, bornee giggol, sabu ko ngol yubbindirta haa timma. ¹⁵ Yo guttu Almasiihu ngu noddiradon fii wonugol bandu wooturu ngun ardo berde mon den. Wonee anditanoobe. ¹⁶ Yo kongol Almasiihu on hebbin berde monden. Jannindiree,

hajondiron e dow faamu fow e nder ko beytiranton Alla beyti Zabuura e jaarooje e beyti hormordi, yettiron Alla beytirangol mo berde mon den fow.¹⁷ Kala ko wadoton, e kongol maa e kuugal, wadee fow e innde Iisaa Joomi on, e jarnirgol mo Alla Baabaajo on.

Fii no Beynguure Almasiyyaabe Haani Wonirde

¹⁸ Rewbe, mo kala e mon, yo yankinano moodi mun, wano hawrirani Joomiraado on non. ¹⁹ Onon kadi worbe, mo kala e mon yo yidu beyngu mun, hara on hunyanaali 6e.

²⁰ Onon kadi faybe, doftee mawbe monben e di fow, ko fii dun no wela Joomiraado on. ²¹ Onon kadi baabiraabe, wota on mettin berde faybe monben, fii wota berde mabbe maayu.

²² Onon kadi yo jiyaabe, doftee jeybe on jeyal adunayankewal ben e di fow, hara hinaa non e gite mabbe tun, wa si tawii on dabbay woni no yimbe ben yidira on, kono hara ko bernde laabunde e nder kulol Joomiraado on. ²³ Kala ko wadoton, wadiree dun ittiri wonkii mon kin fow, wa si tawii ko Joomiraado on wondon wadande, hara hinaa yimbe ben, ²⁴ e hoore andugol mon on hebiray Joomiraado on ndondi wa ngeenaari. Ko Almasiihu Joomi on wondon kurkanaade. ²⁵ Ko fii kala on wadudo ko boni, o hettay njoddi bonnere makko nden, awa kadi gidaale alaa ton.

4 ¹ Onon kadi yo jeybe, jogoree jiyaabe monben no feewiri e no nundiri, e hoore andugol wonde onon kadi hidon mari Jeydo on ka kammu.

Fii Waajuuji Puulusa Goo

² Duumee e toragol Alla, hakkilanon e dun e dow yettugol mo. ³ Toranodon men kadi, fii yo Alla udditan kongudi amen din dambugal fii no men waawira fejnininirde goonga luggudo *Almasiihu on, on goonga mo mi jolkaa fii mun, ⁴ e no mi yewtira fii on goonga no laabiri, wano haaniranimm non. ⁵ E telen-ma 6e

gomdinaa ɓen, wondiree faamu, hara on accaali fajuhun woo feyŷira on.⁶ Yo taw soono woo kongudi mondin ko weldi, hara hidî weliri wa landan, fii no andiron ko honno jaabortion mo kala.

Fii Rawnoode nden e Salminaango ngon

⁷ Tikiiki, oo musiddo an yidaado, golloowo holniido mo mi kurkodata fii golle Joomiraado on, o andinoyay on fow fii no mi fewndori.⁸ Ko wadi si mi immini mo haa e mon, ko fii no andiron no men fewndori, e fii yo o wakkilin ɓerde mon den.⁹ Mi immindinanii on mo e oo musiddo yidaado sella-findeejo wi'eteedo Onesiima, on ko mo mon. Be andinoyay on ko woni feyyude gaa kon fow.

¹⁰ Oo wondiddo an e joge wi'eteedo Aristarke salminii on, wondude e Markuusa, oo dendiraawo Barnabaasi, on mo tindinanadon fii mun. Si o hewtoyii ka mon, wernee mo moyŷa.¹¹ Iisaa jammaado Yustuusa kadi salminii on. E nder lejol *Yahuuda ngol, kobee doo tun woni gollidude e an fii *laamateeri Alla ndin, ɓe woni wakkilinbe lan.¹² Oo kurkaadu Iisaa Almasiihu on wi'eteedo Epafaraasi salminii on, on ko mo mon. Himo duumii e tippiro fii mon e nder torndeeji makko din, fii no tabitiron wa mokobaabe, heewube hoolaare e telen-ma faale Alla on fow.¹³ Mido seeditanii mo dün, wonde o yanganike on fota, e fii bee ɓe Laa'udiisa e fii bee ɓe Hiirapolisa.

¹⁴ Awa kadi, oo jawndoowo yidaado wi'eteedo Luuka, wondude e Demaasi, salminii on.¹⁵ Salminanee lan musibbe wonbe Laa'udiisa ɓen, kajun e oo debbo wi'eteedo Nimfaasi, e *moftal wongal ka suudu makko ngal.¹⁶ Si nduu batakuru jangaama ka mon, etee kadi no ndu jangiree ka moftal wongal Laa'udiisa. Jangon kadi iwranayndu on ndun Laa'udiisa.¹⁷ Wi'on kadi oo wi'eteedo Arkiipe yo o eto no o timminira dee golle de o hebiri Joomiraado on.

¹⁸ Min Puulusa, mi salminirii on jungo an ngon tigi. Awa anditee fii jolokooje anden. Yo moyŷere wonan on.

ÉPÎTRE DE PAUL AUX COLOSSIENS

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée